

Na osnovu člana 21., člana 22. tačka 11), člana 84. stav (1), člana 85. stav (2) i člana 90. stav (1) Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13 i 94/15), člana 27. stav (2) Zakona o korištenju obnovljivih izvora energije i efikasne kogeneracije („Službene novine Federacije BiH“ broj 70/13 i 5/14), člana 10., člana 11. stav (1) i člana 23. stav (1) i stav (2) Statuta Regulatorne komisije za energiju u Federaciji Bosne i Hercegovine („Službene novine Federacije BiH“ broj 24/14 i 91/15), člana 32. stav (1) i člana 42. stav (3) Poslovnika o radu Regulatorne komisije za energiju u Federaciji Bosne i Hercegovine („Službene novine Federacije BiH“ broj 29/14 i 31/16), Regulatorna komisija za energiju u Federaciji Bosne i Hercegovine je na XXIV redovnoj sjednici održanoj 16.12.2016. godine usvojila

PRAVILNIK ZA IZDAVANJE DOZVOLA

DIO PRVI - OPŠTE ODREDBE

Član 1. (Predmet)

- (1) Pravilnikom za izdavanje dozvola (u daljem tekstu: Pravilnik) Regulatorna komisija za energiju u Federaciji Bosne i Hercegovine (u daljem tekstu: FERK) propisuje postupak za izdavanje, obnovu, izmjenu i dopunu, prenos i oduzimanje dozvola za obavljanje elektroprivrednih djelatnosti, dozvola za rad za proizvodnju električne energije u mikro-postrojenju OIE, dozvole za rad Operatoru za obnovljive izvore energije i efikasnu kogeneraciju (u daljem tekstu: Operator za OIEiEK), prethodnih saglasnosti za izgradnju direktnog voda (u daljem tekstu: prethodne saglasnosti), kriterije za izdavanje, uslove, vrste, sadržaj i period važenja dozvola i saglasnosti, kao i način vođenja registra izdatih i oduzetih dozvola i saglasnosti, te način njihovog nadgledanja.
- (2) Postupak izdavanja dozvola i saglasnosti je javan i vodi se u skladu sa objektivnim i javnosti poznatim kriterijima na nediskriminirajući i transparentan način.
- (3) FERK je dužan konsultovati se o uslovima svake dozvole prije izdavanja dozvole i pozvati zainteresovana lica na davanje komentara na nacrt dozvole kroz proces javne rasprave, bilo davanjem usmenih ili pisanih komentara na razmatranje FERK-u.

Član 2. (Cilj)

Cilj ovog Pravilnika je utvrđivanje i osiguranje transparentnog, efikasnog i ekonomičnog postupka izdavanja dozvola i saglasnosti iz nadležnosti FERK-a.

Član 3. (Definicije i skraćenice)

Definicije i skraćenice termina koji se koriste u Pravilniku, uključujući i one iz Zakona o električnoj energiji u Federaciji Bosne i Hercegovine, Zakona o korištenju

obnovljivih izvora energije i efikasne kogeneracije i Poslovnika o radu Regulatorne komisije za energiju u Federaciji Bosne i Hercegovine su sljedeće:

- a) „BOS“ znači balansno odgovorna strana;
- b) „DERK“ znači Državna regulatorna komisija za električnu energiju u Bosni i Hercegovini;
- c) „Direktni vod“ znači dalekovod koji povezuje izolirano mjesto proizvodnje sa izoliranim kupcem ili dalekovod koji povezuje proizvođača električne energije i dobavljača električne energije radi direktnog snabdijevanja njihovih vlastitih objekata, podružnica i kupaca;
- d) „Distribucija“ znači razvođenje električne energije sredjenaponskom i niskonaponskom distributivnom mrežom sa ciljem isporuke kupcima, ali ne uključuje snabdijevanje;
- e) „Dozvola za rad (licenca)“ znači ovlaštenje nadležnog organa za obavljanje određene elektroprivredne djelatnosti;
- f) „Elektroenergetski subjekat“ znači pravno lice koje je osnovano u skladu sa Zakonom o privrednim društvima i obavlja najmanje jednu od sljedećih djelatnosti: proizvodnja, prenos, distribucija, snabdijevanje ili trgovina električnom energijom;
- g) „Fizičko lice“ je ono lice koje je registrovano u skladu sa Zakonom o obrtu za obavljanje djelatnosti proizvodnje električne energije u objektima instalisane snage do 150 kW;
- h) „Imalac dozvole“ je fizičko ili pravno lice, kojem je FERK izdao dozvolu za obavljanje elektroprivredne djelatnosti, uključujući i mikro-postroizvođača OIE i Operatora za OIEiEK;
- i) „Instalisana snaga elektrane“ znači zbir nazivnih snaga svih proizvodnih jedinica u postrojenju;
- j) „Izgradnja“ znači građenje elektroenergetskih objekata, uređaja, vodova i postrojenja u skladu sa važećim propisima, standardima, tehničkim normativima koji se odnose na tu vrstu objekata kao i propisima kojima su utvrđeni uslovi u pogledu zaštite životne sredine i ne smiju ugrožavati sigurnost ljudi i imovine;
- k) „Javna rasprava“ znači raspravu koja se održava u postupcima pred FERK-om i koja je otvorena za javnost, a može biti opšta rasprava, tehnička rasprava i formalna rasprava;
- l) „Licencirana djelatnost“ je elektroprivredna djelatnost proizvodnje električne energije, distribucije električne energije, snabdijevanja električnom energijom i trgovine električnom energijom, koju obavljaju fizička ili pravna lica uz uslov dobivanja dozvole za obavljanje djelatnosti u skladu sa odredbama zakona. Licencirana djelatnost je i djelatnost Operatora za OIEiEK;
- m) „Mikro-postrojenje OIE“ znači postrojenje za proizvodnju električne energije iz OIE, instalisane snage između 2 kW i 23 kW, koje mora biti locirano u okolini ili u sklopu postojećeg objekta i već posjedovati brojilo električne energije, a čiji je vlasnik fizičko ili pravno lice koje je ujedno i krajnji kupac električne energije od jednog od snabdjevača iz Federacije Bosne i Hercegovine, te koje ima pravo na ostvarivanje posebnog podsticaja u skladu sa Zakonom o korištenju obnovljivih izvora energije i efikasne kogeneracije;
- n) Mikro-proizvođač OIE“ znači fizičko ili pravno lice koje je vlasnik mikro-postrojenja OIE;

- o) „Nezavisni proizvođač“ znači proizvođača koji ne obavlja djelatnost proizvodnje električne energije kao javnu uslugu, a koji posjeduje vlastite objekte za proizvodnju električne energije radi prodaje na tržištu;
- p) „NOSBiH“ znači Nezavisni operator sistema u Bosni i Hercegovini;
- q) „Opšti uslovi za isporuku električne energije“ su uslovi kojima se definišu energetska i tehnička uslovi, te ekonomski odnosi između proizvođača, operatora distributivnog sistema, snabdjevača, korisnika mreže i krajnjeg kupca električne energije, uključujući i podnosioca zahtjeva za dobivanje elektroenergetske saglasnosti;
- r) „Operator distributivnog sistema“ (u daljem tekstu: ODS) znači pravno lice koje posjeduje licencu - dozvolu za djelatnost distribucije i nadležan je za pogon, upravljanje, održavanje, izgradnju i razvoj elektrodistributivne mreže i priključivanje novih kupaca i proizvođača;
- s) „Operator za OIEiEK“ znači pravno lice koje obavlja poslove u skladu sa odredbama Zakona o korištenju obnovljivih izvora energije i efikasne kogeneracije, te nema status snabdjevača;
- t) „Podnosilac zahtjeva“ je pravno ili fizičko lice, koje podnosi zahtjev FERK-u za izdavanje dozvole za obavljanje elektroprivredne djelatnosti ili zahtjev za obavljanje djelatnosti Operatora za OIEiEK ili zahtjev za izdavanje prethodne saglasnosti za izgradnju direktnog voda u skladu sa zakonom i ovim Pravilnikom;
- u) „Proizvodnja“ znači proizvodnju električne energije;
- v) „Proizvođač“ znači fizičko ili pravno lice koje proizvodi električnu energiju;
- w) „Proizvođač za vlastite potrebe“ znači fizičko ili pravno lice koje električnu energiju proizvodi za vlastite potrebe;
- x) „Regulatorna naknada“ znači novčani iznos koji FERK naplaćuje imaocima dozvola koji se, u skladu sa zakonom, bave jednom ili više licenciranih djelatnosti, a koji FERK određuje na godišnjem nivou;
- y) „RERS“ znači Regulatorna komisija za energetiku Republike Srpske;
- z) „Snabdijevanje“ znači prodaju električne energije kupcima, uključujući preprodaju električne energije;
- aa) „Sigurnost“ znači sigurnost snabdijevanja, elektroenergetsku sigurnost i tehničku sigurnost;
- bb) „Snabdjevač“ znači svako pravno lice koje posjeduje dozvolu za obavljanje djelatnosti snabdijevanja kupaca električnom energijom izdatu od nadležnog regulatornog organa;
- cc) „Trgovina“ znači kupovinu i prodaju električne energije, isključujući prodaju krajnjem kupcu;
- dd) „Umješak“ znači zainteresovano lice koje ima poseban interes učestvovati u postupku i kome je od članova FERK-a odobren ovaj status u postupku;
- ee) „Voditelj postupka“ znači lice, koje FERK ovlasti za provođenje postupka javne rasprave i izradu izvještaja sa preporukom za odlučivanje članovima FERK-a.

Član 4.

(Obaveza posjedovanja dozvole)

- (1) Elektroenergetski subjekti, koji obavljaju ili žele obavljati jednu ili više elektroprivrednih djelatnosti, kao i fizička lica registrovana skladu sa Zakonom o

obrtu i srodnim djelatnostima koja obavljaju ili žele obavljati djelatnost proizvodnje električne energije obavezni su imati, odnosno, pribaviti dozvolu za rad od FERK-a, u skladu sa Zakonom o električnoj energiji u Federaciji Bosne i Hercegovine i ovim Pravilnikom.

- (2) Fizička lica i elektroenergetski subjekti koji obavljaju ili žele obavljati djelatnost proizvodnje električne energije u mikro-postrojenju OIE obavezni su pribaviti dozvolu za rad od FERK-a.
- (3) Elektroenergetski subjekat, koji ima namjeru graditi direktni vod, obavezan je pribaviti prethodnu saglasnost, prije izdavanja odobrenja za građenje od nadležnog organa uprave.
- (4) Operator za OIEiEK obavezan je pribaviti dozvolu za rad od FERK-a.
- (5) Lica iz stava (1), stava (2), stava (3) i stava (4) ovog člana imaju obavezu podnijeti zahtjev za izdavanje dozvole, odnosno prethodne saglasnosti.
- (6) Podnosilac zahtjeva za izdavanje dozvole, odnosno prethodne saglasnosti ima obavezu ispuniti sve kriterije propisane zakonom i ovim Pravilnikom.
- (7) Fizičko ili pravno lice koje proizvodi električnu energiju za vlastite potrebe ne podliježe obavezi pribavljanja dozvole za rad koju izdaje FERK.

Član 5. (Vrste dozvola)

- (1) U skladu sa odredbama Zakona o električnoj energiji u Federaciji Bosne i Hercegovine vrste dozvola, koje FERK izdaje, su sljedeće:
 - a) dozvola za rad za proizvodnju električne energije,
 - b) dozvola za rad za distribuciju električne energije,
 - c) dozvola za rad za snabdijevanje i trgovinu električnom energijom, koja se izdaje kao:
 - 1) dozvola za snabdijevanje električnom energijom - dozvola I reda,
 - 2) dozvola za snabdijevanje električnom energijom - dozvola II reda,
 - d) dozvola za rad za proizvodnju električne energije u mikro-postrojenju OIE,
 - e) dozvola za rad Operatoru za OIEiEK.
- (2) Dozvola I reda izdaje se elektroenergetskim subjektima za snabdijevanje električnom energijom krajnjih kupaca koji se snabdijevaju u okviru javne usluge.
- (3) Dozvola II reda izdaje se elektroenergetskim subjektima, koji obavljaju djelatnost:
 - a) proizvodnje električne energije i vrše prodaju električne energije,
 - b) snabdijevanja električnom energijom krajnjih kupaca i
 - c) trgovine električnom energijom na unutrašnjem tržištu.

Član 6. (Period važenja dozvole)

- (1) Dozvola za rad za proizvodnju električne energije, uključujući i dozvolu za rad za proizvodnju električne energije u mikro-prostrojenju OIE, izdaje se na period do 30 godina.
- (2) Dozvola za rad za distribuciju električne energije izdaje se na period do 50 godina.
- (3) Dozvola za rad za snabdijevanje i trgovinu električnom energijom, odnosno dozvola I reda i dozvola II reda izdaju se na period do pet godina.
- (4) Dozvola za rad Operatoru za OIEiEK izdaje se na period do 15 godina.

DIO DRUGI - POSTUPAK IZDAVANJA DOZVOLA I PRETHODNE SAGLASNOSTI

Član 7.

(Pokretanje postupka)

- (1) Postupak izdavanja dozvole za rad za obavljanje elektroprivredne djelatnosti, dozvole za rad za proizvodnju električne energije u mikro-postrojenju OIE, dozvole za rad Operatoru za OIEiEK ili prethodne saglasnosti pokreće se na zahtjev podnosioca zahtjeva.
- (2) U skladu sa Zakonom o električnoj energiji u Federaciji Bosne i Hercegovine i Zakonom o korištenju obnovljivih izvora energije i efikasne kogeneracije podnosioci zahtjeva za izdavanje dozvole za rad ili zahtjeva za izdavanje prethodne saglasnosti su lica iz člana 4. stavova (1), (2), (3) i (4) ovog Pravilnika.
- (3) Elektroenergetski subjekti, koji obavljaju ili žele obavljati jednu ili više elektroprivrednih djelatnosti, obavezni su podnijeti zahtjev za izdavanje dozvole za rad za svaku pojedinačnu djelatnost.

Član 8.

(Obrasci zahtjeva)

- (1) Zahtjevi kojima se pokreću postupci pred FERK-om u smislu ovog Pravilnika podnose se na obrascima FERK-a, koji su sastavni dio Priloga 1 ovog Pravilnika, i to:
 - a) Obrazac 1: zahtjev za izdavanje/obnovu dozvole za rad za proizvodnju električne energije,
 - b) Obrazac 2: zahtjev za izdavanje/obnovu dozvole za rad za distribuciju električne energije,
 - c) Obrazac 3: zahtjev za izdavanje/obnovu dozvole za snabdijevanje električnom energijom - dozvole I reda,
 - d) Obrazac 4: zahtjev za izdavanje/obnovu dozvole za snabdijevanje električnom energijom – dozvole II reda,
 - e) Obrazac 5: zahtjev za izdavanje/obnovu dozvole za rad za proizvodnju električne energije u mikro-postrojenju OIE,
 - f) Obrazac 6: zahtjev za izdavanje prethodne saglasnosti za izgradnju direktnog voda,
 - g) Obrazac 7: zahtjev za izdavanje/obnovu dozvole za rad Operatoru za OIEiEK,
 - h) Obrazac 8: zahtjev za izmjenu i dopunu dozvole za rad,
 - i) Obrazac 9: zahtjev za prenos dozvole za rad,
 - j) Obrazac 10: zahtjev za oduzimanje dozvole za rad.
- (2) Obrasci tabela koji se prilažu uz zahtjev, a koji su dati u Prilogu 2 ovog Pravilnika su:
 - a) Tabela 1: osnovni tehničko-energetski parametri solarne elektrane,
 - b) Tabela 2: osnovni tehničko-energetski parametri hidroelektrane,
 - c) Tabela 3: osnovni tehničko-energetski parametri termoelektrane,
 - d) Tabela 4: osnovni tehničko-energetski parametri vjetroelektrane,
 - e) Tabela 5: osnovni tehničko-energetski parametri elektrane na bioplin,
 - f) Tabela 6: osnovni tehničko-energetski parametri elektrane na biomasu.
- (3) Obrasci za podnošenje zahtjeva mogu se dobiti u sjedištu FERK-a ili preuzeti sa internet stranice FERK-a.

Član 9.

(Popunjavanje i dostavljanje zahtjeva)

- (1) Pod podnošenjem zahtjeva za izdavanje dozvole za rad, odnosno prethodne saglasnosti podrazumijeva se dostavljanje popunjenog obrasca zahtjeva za izdavanje dozvole za rad, odnosno prethodne saglasnosti sa pratećom dokumentacijom u pisanoj formi na adresu FERK-a, neposredno ili putem pošte, a može se poslati i faksom ili elektronski.
- (2) Ukoliko se zahtjev iz stava (1) ovog člana šalje elektronski, FERK o prijemu istog obavještava podnosioca zahtjeva, bez obzira da li je isti tražio potvrdu o prijemu, te nakon što podnosilac zahtjeva primi ovo obavještenje, zahtjev se smatra dostavljenim u FERK.
- (3) Popunjen obrazac zahtjeva za izdavanje dozvole za rad, odnosno obrazac zahtjeva za izdavanje prethodne saglasnosti sa potpunom pratećom dokumentacijom treba biti ovjeren i potpisan od podnosioca, odnosno njegovog zakonskog zastupnika ili ovlaštenog opunomoćenika.
- (4) Prateću dokumentaciju čine dokazi kojima podnosilac potvrđuje svoje navode iz zahtjeva.
- (5) Dokumentacija i informacije koje su dostavljene faksom ili elektronski u originalu ili ovjerenj kopiji dostavljaju se i lično ili poštom na adresu FERK-a najkasnije u roku od sedam dana od dana dostave faksom ili elektronski.
- (6) Prateća dokumentacija se prilaže u originalu ili ovjerenj kopiji, s tim da ne smije biti starija od 60 dana.

Član 10.

(Regulatorna naknada i jednokratna naknada za obradu zahtjeva)

- (1) Visinu regulatorne naknade FERK propisuje posebnom odlukom na godišnjem osnovu.
- (2) Jednokratna naknada za obradu zahtjeva koju FERK utvrđuje posebnom odlukom uplaćuje se prilikom podnošenja zahtjeva, a dokaz o uplati se prilaže uz zahtjev.

Član 11.

(Razmatranje zahtjeva)

- (1) FERK razmatra zahtjev za dozvolu za rad, odnosno prethodnu saglasnost samo ukoliko je zahtjev potpun i sadrži dokumentaciju propisanu ovim Pravilnikom.
- (2) FERK razmatra zahtjev prema kriterijima propisanim ovim Pravilnikom, vodeći pri tome računa o opštem javnom interesu i bezbjednosti snabdijevanja električnom energijom.

Član 12.

(Utvrđivanje potpunosti zahtjeva)

- (1) Zahtjev je potpun kada su uz zahtjev podneseni svi traženi dokumenti i uplaćena jednokratna naknada za obradu zahtjeva.
- (2) U roku od 30 dana od dana prijema zahtjeva, FERK u pisanoj formi obavještava podnosioca zahtjeva o nedostatku zahtjeva. Ukoliko u roku od 30 dana od dana prijema zahtjeva, FERK ne obavijesti podnosioca o nedostatku zahtjeva, smatrat će se da je isti od početka bio uredan.

- (3) Izuzeto od odredbi stava (2) ovog člana, ukoliko se radi o zahtjevu za dozvolu za rad za proizvodnju električne energije u mikro-postrojenju OIE ili zahtjevu za dozvolu za rad za proizvodnju električne energije podnosioca koji je fizičko lice i koji će tu djelatnost obavljati u statusu obrtnika, u objektima instalisane snage do 23 kW, FERK će u roku od 21 dan od dana prijema zahtjeva u pisanoj formi obavijestiti podnosioca zahtjeva o nedostatku zahtjeva. Ukoliko u roku od 21 dan od dana prijema zahtjeva, FERK ne obavijesti podnosioca o nedostatku zahtjeva, smatrat će se da je isti od početka bio uredan
- (4) Ako zahtjev sadrži formalni nedostatak, koji sprječava postupanje po takvom zahtjevu ili je zahtjev nerazumljiv ili nepotpun ne može se samo zbog toga odbaciti. Ukoliko FERK primi takav zahtjev, podnosiocu određuje rok od osam dana radi otklanjanja uočenih nedostataka, osim ukoliko FERK ne odredi neki drugi razuman rok u zavisnosti od konkretnih okolnosti.
- (5) Ako podnosilac ne otkloni nedostatke iz stava (1) i stava (3) ovog člana u datome roku FERK smatra da takav zahtjev nije ni podnesen, o čemu se podnosilac zahtjeva posebno upozorava u pozivu za ispravku zahtjeva.

Član 13.

(Dopuna zahtjeva)

- (1) FERK može i nakon potpunosti zahtjeva, a u toku postupka izdavanja dozvole za rad, odnosno postupka izdavanja prethodne saglasnosti, tražiti dodatne informacije i dokumentaciju ukoliko je to neophodno za donošenje odluke po zahtjevu za izdavanje dozvole za rad, odnosno po zahtjevu za izdavanje prethodne saglasnosti.
- (2) Podnosilac zahtjeva je dužan saradivati u pogledu bilo kojeg FERK-og zahtjeva za informacijama i dostavljati podatke i informacije iz stava (1) ovog člana u rokovima i na način koji odredi FERK.

Član 14.

(Odustajanje od zahtjeva)

- (1) Podnosilac zahtjeva za izdavanje dozvole za rad, odnosno zahtjeva za izdavanje prethodne saglasnosti može odustati od svog zahtjeva u toku cijelog postupka.
- (2) Ako podnosilac odustane od zahtjeva, FERK će donijeti zaključak kojim se postupak obustavlja.
- (3) Podnosilac zahtjeva ima pravo na povrat uplaćene jednokratne naknade za obradu zahtjeva ukoliko odustane od zahtjeva u skladu sa FERK-ovom Odlukom o iznosima jednokratnih naknada za obradu podnesaka.

Član 15.

(Pregled i provjera podataka)

- (1) FERK može provjeriti sve podatke i izvršiti pregled objekata, postrojenja i opreme podnosioca zahtjeva, u cilju utvrđivanja činjenica o ispunjavanju kriterija propisanih za izdavanje dozvole za rad, odnosno prethodne saglasnosti.
- (2) Provjera se može obaviti u bilo kojoj fazi postupka od trenutka podnošenja zahtjeva do donošenja konačne odluke o zahtjevu, te i nakon izdavanja dozvole za rad u skladu sa članom 46. ovog Pravilnika.

- (3) Ukoliko podnosilac zahtjeva ne omogući provjeru ili pregled iz stava (1) ovog člana, time isti FERK sprječava u utvrđivanju činjenica o ispunjavanju kriterija propisanih za izdavanje dozvole za rad, odnosno prethodne saglasnosti, na osnovu čega FERK odbija zahtjev za izdavanje dozvole za rad, odnosno zahtjev za izdavanje prethodne saglasnosti.

Član 16.

(Nacrt dozvole i obavještenje za javnost)

- (1) Nakon potpunosti zahtjeva za izdavanje dozvole za rad, odnosno zahtjeva za izdavanje prethodne saglasnosti za izgradnju direktnog voda u skladu sa članom 12. ovog Pravilnika, FERK utvrđuje nacrt dozvole ili donosi drugu odluku o zahtjevu na redovnoj sjednici.
- (2) Ukoliko utvrdi nacrt dozvole za rad FERK donosi odluku u kojoj se imenuje voditelj postupka i zamjenik voditelja postupka, te utvrđuje način i rokove za dostavljanje pisanih komentara javnosti na nacrt dozvole za rad.
- (3) FERK objavljuje obavještenje za javnost koje sadrži osnovne informacije o nacrtu dozvole za rad, načinu i roku dostavljanja pisanih komentara javnosti na nacrt dozvole za rad i eventualne druge informacije u vezi sa nacrtom dozvole za rad, na oglasnoj tabli i internet stranici FERK-a.
- (4) Ukoliko su primljeni pisani komentari voditelj postupka i drugi zaposlenici, ukoliko su određeni, izrađuju pisani izvještaj, koji sadrži komentare, analizu pisanih komentara i preporuku članovima FERK-a.
- (5) Pisani izvještaj iz stava (4) ovog člana, voditelj postupka dostavlja podnosiocu zahtjeva sa rokom za dostavu komentara na izvještaj, koje zajedno sa izvještajem dostavlja članovima FERK-a na razmatranje radi donošenja odluke.

Član 17.

(Javne rasprave)

U toku postupka izdavanja dozvola za rad, FERK određuje vrstu i broj javnih rasprava cijeneći podnesene komentare, eventualne zahtjeve za sticanje statusa umješaća i dokaze koji potkrepljuju takav zahtjev i druge informacije, a sve u skladu sa Poslovníkom o radu FERK-a i Pravilnikom o javnim raspravama i rješavanju zahtjeva, sporova i žalbi.

Član 18.

(Odluka o izdavanju dozvole za rad i izdavanju prethodne saglasnosti)

- (1) Konačnu odluku o podnesenom zahtjevu za izdavanje dozvole za rad, odnosno prethodne saglasnosti, FERK donosi na redovnoj sjednici nakon provedenog postupka u roku ne dužem od 60 dana od dana potpunosti zahtjeva.
- (2) Izuzeto od odredbi stava (1) ovog člana, ukoliko se radi o zahtjevu za dozvolu za rad za proizvodnju električne energije u mikro-postrojenju OIE ili zahtjevu za dozvolu za rad za proizvodnju električne energije podnosioca koji je fizičko lice i koji će tu djelatnost obavljati u statusu obrtnika, u objektima instalisane snage do 23 kW, konačnu odluku o podnesenom zahtjevu za izdavanje dozvole za rad, FERK donosi na redovnoj sjednici nakon provedenog postupka u roku ne dužem od 50 dana od dana potpunosti zahtjeva.

- (3) FERK odluku iz stava (1) i stava (2) ovog člana, donosi u formi rješenja, s tim da je u postupcima izdavanja dozvola za rad, sastavni dio tog rješenja izdata dozvola za rad i uslovi dozvole za rad.
- (4) Dozvola za rad, odnosno prethodna saglasnost počinje važiti na dan određen u rješenju o izdavanju dozvole za rad, odnosno prethodne saglasnosti.
- (5) Rješenje o izdavanju dozvole za rad, odnosno prethodne saglasnosti objavljuje se na oglasnoj tabli i internet stranici FERK-a.
- (6) Dispozitiv rješenja objavljuje se u „Službenim novinama Federacije BiH“.

Član 19.

(Odluka o odbijanju zahtjeva)

- (1) FERK će odbiti zahtjev za izdavanje dozvole za rad, odnosno prethodne saglasnosti ako podnosilac zahtjeva ne dokaže ispunjavanje kriterija za izdavanje dozvole za rad, odnosno prethodne saglasnosti.
- (2) FERK može odbiti zahtjev za izdavanje dozvole za rad, odnosno prethodne saglasnosti i u sljedećim slučajevima:
 - a) ako je imalac dozvole, u ranijem postupku pred FERK-om, dao neistinite podatke, na osnovu kojih je FERK u tom ranijem postupku izdao dozvolu za rad ili prethodnu saglasnost, odnosno obnovio, izmijenio i dopunio, ili izvršio prenos dozvole za rad i
 - b) ako podnosilac zahtjeva nije postupio po uslovima propisanim u prethodno izdatoj dozvoli za rad.
- (3) Odluku o odbijanju zahtjeva za izdavanje dozvole za rad, odnosno prethodne saglasnosti FERK donosi u formi rješenja na redovnoj sjednici.

DIO TREĆI – DOKUMENTI, KRITERIJI I USLOVI DOZVOLA

POGLAVLJE I DOZVOLE ZA OBAVLJANJE ELEKTROPRIVREDNIH DJELATNOSTI – DOZVOLE ZA RAD

Odjeljak A. Potrebni dokumenti koji se prilažu uz zahtjev za izdavanje dozvole za obavljanje elektroprivrednih djelatnosti – dozvole za rad

Član 20.

(Zajednički dokumenti)

Uz zahtjev za izdavanje dozvole za obavljanje elektroprivrednih djelatnosti – dozvole za rad obavezno se prilažu sljedeći dokumenti:

- a) aktuelni izvod iz sudskog registra nadležnog suda za pravna lica, odnosno obrtnica za fizička lica, koja djelatnost proizvodnje električne energije obavljaju u statusu obrtnika;
- b) obavještenje o razvrstavanju pravnog lica prema djelatnosti nadležne službe za statistiku;
- c) uvjerenje nadležne poreske uprave, a ukoliko je podnosilac zahtjeva obaveznik i uvjerenje o registraciji/upisu u Jedinostveni registar obaveznika direktnih poreza;

- d) organizaciona struktura podnosioca zahtjeva iz koje je vidljivo da zapošljava stručno osposobljeni kadar za obavljanje djelatnosti za koju podnosi zahtjev;
- e) dokaz da podnosilac zahtjeva ima pravni osnov za korištenje objekata, postrojenja, uređaja i opreme za obavljanje elektroprivredne djelatnosti za koju podnosi zahtjev;
- f) komplet finansijskih izvještaja za prethodnu godinu (bilans stanja, bilans uspjeha, izvještaj o gotovinskim tokovima, izvještaj o promjenama na kapitalu, bilješke uz finansijske izvještaje i izvještaj nezavisnog revizora u skladu sa važećim propisima), a za novoosnovano pravno lice početni bilans;
- g) fizička lica dostavljaju poslovne knjige i poslovne evidencije za prethodnu godinu;
- h) izjavu o svim otvorenim transakcijskim računima podnosioca zahtjeva sa priloženom potvrdom poslovne banke kod koje se nalazi glavni račun o solventnosti tog računa;
- i) godišnji planovi poslovanja podnosioca zahtjeva;
- j) dokaz da podnosilac zahtjeva elektroprivrednu djelatnost za koju podnosi zahtjev u skladu sa Zakonom o električnoj energiji u Federaciji Bosne i Hercegovine obavlja funkcionalno razdvojeno, a ODS i pravno razdvojeno, od ostalih djelatnosti i
- k) dokaz o uplati jednokratne naknade za obradu zahtjeva.

Član 21.

(Dodatni dokumenti uz zahtjev za izdavanje dozvole za rad
za proizvodnju električne energije)

- (1) Uz zahtjev za izdavanje dozvole za rad za proizvodnju električne energije, pored dokumenata definisanih u članu 20. ovog Pravilnika, obavezno se prilažu i sljedeći dokumenti:
 - a) tabelarni pregled elektroenergetskih objekata, postrojenja, kojima će se obavljati licencirana djelatnost sa tehničko-energetskim parametrima elektroenergetskih postrojenja i objekata (Prilog 2 ovog Pravilnika);
 - b) plan održavanja, korištenja i posmatranja proizvodnog objekta koji podliježe toj obavezi prema važećim zakonima i propisima;
 - c) energetska dozvola;
 - d) vodna dozvola (sa klauzulom pravosnažnosti) gdje je propisano;
 - e) okolinska dozvola (sa klauzulom pravosnažnosti) gdje je propisano;
 - f) ugovori o koncesiji, ako se djelatnost obavlja na osnovu koncesije;
 - g) dokaz da je podnosilac zahtjeva krajnji kupac električne energije od jednog od snabdjevača u Federaciji BiH odnosno da je zaključio ugovor o snabdijevanju električnom energijom, ukoliko se radi o zahtjevu za dozvolu za rad za proizvodnju električne energije u mikro-postrojenju OIE;
 - h) elektroenergetska saglasnost za krajnjeg kupca i elektroenergetska saglasnost za mikro-postrojenje OIE ukoliko se radi o zahtjevu za dozvolu za rad za proizvodnju električne energije u mikro-postrojenju OIE;
 - i) elektroenergetsku saglasnost za proizvođača izdatu od nadležnog operatora mreže i
 - j) odobrenje za upotrebu proizvodnog objekta (sa klauzulom pravosnažnosti).
- (2) Uz zahtjev za izdavanje dozvole za rad za proizvodnju električne energije, čiji je podnosilac fizičko lice, koje proizvodnju električne energije obavlja u statusu obrtnika, u proizvodnim objektima instalisane snage do 23kW, obavezno se prilažu

dokumenti iz stava (1) ovog člana, osim tačke b), te dokumenti iz člana 20. ovog Pravilnika osim dokumenta iz tačke f).

Član 22.

(Dodatni dokumenti uz zahtjev za izdavanje dozvole za rad
za distribuciju električne energije)

Uz zahtjev za izdavanje dozvole za rad za distribuciju električne energije, pored dokumenata definisanih u članu 20. ovog Pravilnika, obavezno se prilažu i sljedeći dokumenti:

- a) tabelarni pregled elektroenergetskih objekata, postrojenja, uređaja i opreme kojima će se obavljati licencirana djelatnost sa tehničko-energetskim parametrima elektroenergetskih postrojenja i objekata;
- b) tabelarni prikaz broja korisnika distributivne mreže po kategoriji i grupi potrošnje električne energije i
- c) obrasci ugovora o priključenju/povećanju/smanjenju priključne snage i ugovora o korištenju distributivne mreže i obrasci prethodne elektroenergetske saglasnosti i elektroenergetske saglasnosti.

Član 23.

(Dodatni dokumenti uz zahtjev za izdavanje dozvole
za snabdijevanje električnom energijom - dozvole I reda)

Uz zahtjev za izdavanje dozvole za snabdijevanje električnom energijom - dozvole I reda, pored dokumenata definisanih u članu 20. ovog Pravilnika, obavezno se prilažu i sljedeći dokumenti:

- a) tabelarni pregled objekata, uređaja i opreme na osnovu kojih će se obavljati licencirana djelatnost;
- b) podaci o planiranom obimu kupovine i prodaje električne energije za snabdijevanje kupaca u okviru javne/univerzalne usluge snabdijevanja;
- c) postojeći broj krajnjih kupaca, po kategoriji i grupi potrošnje, odnosno planirani broj krajnjih kupaca za naredni period i
- d) obrasci ugovora o snabdijevanju električnom energijom.

Član 24.

(Dodatni dokumenti uz zahtjev za izdavanje dozvole za
snabdijevanje električnom energijom – dozvole II reda)

Uz zahtjev za izdavanje dozvole za snabdijevanje električnom energijom – dozvole II reda, pored dokumenata definisanih u članu 20. ovog Pravilnika, obavezno se prilažu i sljedeći dokumenti:

- a) tabelarni pregled objekata, uređaja i opreme na osnovu kojih će se obavljati licencirana djelatnost;
- b) dokaz o upisanom i uplaćenom osnovnom kapitalu u iznosu od 1.000.000 KM;
- c) podatke o planiranom obimu kupovine i prodaje električne energije za snabdijevanje krajnjih kupaca, ukoliko će obavljati djelatnost snabdijevanja krajnjih kupaca električnom energijom i
- d) planirani godišnji obim trgovine električnom energijom na unutrašnjem tržištu isključujući prodaju krajnjem kupcu.

Odjeljak B. Kriteriji za donošenje odluke o izdavanju dozvole za obavljanje elektroprivrednih djelatnosti – dozvole za rad

Član 25.

(Kriteriji za donošenje odluke o izdavanju dozvole za obavljanje elektroprivrednih djelatnosti – dozvole za rad)

- (1) Dozvola za obavljanje elektroprivredne djelatnosti – dozvola za rad izdaje se podnosiocu zahtjeva koji dokaže da:
- a) je obavljanje djelatnosti za koju traži dozvolu za rad upisao u odgovarajući registar;
 - b) licenciranu djelatnost obavlja funkcionalno razdvojeno, ODS i pravno razdvojeno, od elektroprivrednih i ostalih djelatnosti;
 - c) ispunjava tehničke, operativne i organizacione i druge uslove za rad, u skladu sa važećim propisima i standardima;
 - d) zapošljava stručno osposobljen kadar za obavljanje licencirane djelatnosti;
 - e) ima pravni osnov za korištenje objekata, postrojenja, uređaja i opreme potrebnih za obavljanje licencirane djelatnosti;
 - f) ispunjava sigurnosne, ekološke i druge uslove u skladu sa važećim propisima i domaćim i međunarodnim standardima;
 - g) podnosiocu zahtjeva, ne traje izrečena sigurnosna mjera zabrane obavljanja djelatnosti za koju podnosi zahtjev;
 - h) posjeduje finansijsku stabilnost za poslovanje kojom se osigurava ispunjavanje uslova dozvole;
 - i) je uspostavio kancelarije za odnose sa kupcima, tamo gdje je propisano;
 - j) je zaključio ugovor o koncesiji, ukoliko je isti neophodan za obavljanje licencirane djelatnosti;
 - k) je pribavio okolinsku dozvolu i osigurava stalnu kontrolu nad uticajem na sigurnost ljudi i okoline, tamo gdje je propisano;
 - l) je pribavio vodnu dozvolu, ukoliko je ista neophodna za obavljanje licencirane djelatnosti;
 - m) posjeduje mjerne uređaje tipa i klase definisanih važećim propisima koji omogućavaju mjerenje električne energije i snage koja se predaje i preuzima iz mreže, gdje je primjenjivo;
 - n) je pribavio energetska dozvolu, tamo gdje je propisano i
 - o) posjeduje finansijsku i tehničku sposobnost u vezi sa korištenjem i održavanjem proizvodnih objekata u skladu sa tehničkim i uslovima zaštite okoline, gdje je primjenjivo.
- (2) Dozvola za rad za proizvodnju električne energije u mikro-postrojenju OIE izdaje se podnosiocu zahtjeva, koji pored kriterija definisanih stavom (1) ovog člana, osim tačke b) ako se radi o fizičkom licu, dokaže i to da je:
- a) podnosilac zahtjeva (mikro-proizvođač OIE) ujedno i krajnji kupac električne energije od jednog od snabdjevača u Federaciji BiH i
 - b) mikro-postrojenje OIE locirano u okolini ili u sklopu postojećeg objekta koji već posjeduje brojilo električne energije, odnosno da je mikro-postrojenje OIE priključeno u tački postojećeg mjerenja ugradnjom posebnog brojila, koje omogućava posebnu registraciju proizvodnje električne energije mikro-postrojenja OIE.

Odjeljak C. Uslovi dozvola za obavljanje elektroprivrednih djelatnosti – dozvola za rad

Član 26.

(Zajednički uslovi dozvola za obavljanje elektroprivrednih djelatnosti
– dozvola za rad)

U dozvole za obavljanje elektroprivredne djelatnosti – dozvole za rad uključuju se uslovi:

- a) koji osiguravaju ispunjavanje kriterija, iz člana 25. ovog Pravilnika;
- b) koji obavezuju imaoца dozvole da reguliše odnose sa drugim učesnicima na tržištu električne energije u skladu sa propisanim pravilima tržišta;
- c) uslovi određeni za osiguranje finansijskog integriteta i stabilnosti imaoца dozvole za obavljanje elektroprivredne djelatnosti;
- d) kojima se zahtijeva puno poštivanje svih važećih zakonskih i podzakonskih akata, te ostalih pravila i propisa;
- e) koji osiguravaju izmjenu/dopunu/prenos dozvole za rad tokom njenog perioda važenja po zahtjevu imaoца dozvole ili na vlastitu inicijativu FERK-a da bi se promijenili uslovi dozvole za rad zbog pojave značajnih izmjena u zakonu ili činjeničnih okolnosti;
- f) zapošljavanja stručno osposobljenog kadra za obavljanje licencirane djelatnosti;
- g) rok u kojem je imalac dozvole za rad obavezan započeti sa obavljanjem djelatnosti za koju je dozvola izdata;
- h) koji zabranjuju napuštanje ili izmjenu obavljanja djelatnosti za koju je izdata dozvola za rad, bez prethodnog odobrenja FERK-a;
- i) kojima se osigurava tajnost podataka koji su označeni kao povjerljivi od subjekta koji ih je dostavio, kao i drugih podataka čija je obaveza čuvanja utvrđena posebnim propisima, a do kojih imalac dozvole dođe prilikom obavljanja djelatnosti;
- j) kojima se imalac dozvole obavezuje dostavljati informacije i podatke u skladu sa FERK-ovim pravilima i propisima o izvještavanju, drugim aktima i uslovima definisanim u dozvoli za rad;
- k) održavanje i razvijanje informaciono-komunikacionih tehnologija, koje se koriste za obavljanje licencirane djelatnosti na tržištu električne energije (softver, hardver i komunikacije);
- l) vodi baze podataka, u vezi sa obavljanjem licencirane djelatnosti;
- m) poštuje pravila propisana za tržište električne energije;
- n) ispunjava obaveze u vezi sa zaštitom povjerljivih informacija i
- o) koji se odnose na obaveze u pogledu plaćanja regulatorne naknade za period važenja dozvole za rad.

Član 27.

(Dodatni uslovi dozvole za rad za proizvodnju električne energije)

- (1) Pored uslova navedenih u članu 26. ovog Pravilnika u uslove dozvole za rad za proizvodnju električne energije uključuju se i dodatni uslovi:

- a) kojima se propisuje obaveza pristupa prenosnoj mreži pod uslovima propisanim pravilima pristupa treće strane na prenosni sistem odnosno pristupa distributivnoj mreži pod uslovima koji su utvrđeni mrežnim pravilima distribucije i drugim propisima;
 - b) kojima se propisuje obaveza da na odgovarajući i nediskriminirajući način, vrši razmjenu informacija kojima raspolaže u svojoj bazi podataka sa učesnicima na tržištu električne energije;
 - c) kojima se osigurava prednost isporuke električne energije za kvalifikovane proizvođače u skladu sa važećim zakonima;
 - d) kojima se obavezuje ugovaranje isporuke i prodaje električne energije pod uslovima utvrđenim važećim zakonima i drugim propisima;
 - e) koji od imaoaca dozvole zahtijevaju pružanje pomoćnih usluga, u skladu sa raspoloživim tehničkim mogućnostima i tehničkim i komercijalnim pravilima na tržištu električne energije;
 - f) kojima se propisuje obaveza da imalac dozvole licenciranu djelatnost kontinuirano obavlja funkcionalno razdvojeno od elektroprivrednih i ostalih djelatnosti;
 - g) kojima se propisuje obaveza posjedovanja mjernih uređaja koji omogućavaju mjerenje električne energije i snage koja se predaje i preuzima iz mreže;
 - h) kojima se propisuje obaveza da obezbjedi registrovanje i analiziranje bezbjednosti i strukturalnog integriteta parametara visokih brana i ostalih građevinskih objekata, uključujući i seizmološke pojave u skladu sa zakonom;
 - i) kojima se propisuje obaveza regulisanja vlasništva ili pravnog osnova za korištenje objekata i postrojenja, odnosno pravnog osnova za korištenje uređaja i opreme u svrhu obavljanja licencirane djelatnosti;
 - j) kojima se propisuje obaveza da osigurava kvantitet, kvalitet i kontinuitet, te energetske efikasnost proizvodnje električne energije, i pridržavanje tehničkih propisa i standarda, propisa zaštite na radu i komercijalnih i tržišnih pravila;
 - k) zadovoljava i poštuje propisane tehničke i pogonske uslove u skladu sa važećim pravilima i propisima;
 - l) kojima se propisuje obaveza da izvrši demontažu i uklanjanje svih objekata i opreme i zemljište i/ili objekat vratiti u prvobitno stanje u skladu sa Zakonom o električnoj energiji u Federaciji Bosne i Hercegovine;
 - m) koji se odnose na obavezu zaštite okoline i osiguranje trajne kontrole uticaja na okolinu u skladu sa zakonima i drugim propisima iz oblasti zaštite okoline;
 - n) koji se odnose na poštovanje uslova iz vodnih dozvola u skladu sa propisima;
 - o) koji zahtijevaju od imaoaca dozvole obavljanje periodične detaljne procjene statusa o bezbjednosti i pouzdanosti postrojenja;
 - p) koji se odnose na obavezu imaoaca dozvole u pogledu potopljenog zemljišta vodnim akumulacijama i degradiranog zemljišta rudničkim kopovima, gdje je to primjenjivo;
 - q) koji se odnose na režim rada proizvodnih objekata na slivovima i
 - r) bilo koji drugi uslov koji postavi FERK da bi se ispunili ciljevi zakona, podzakonskih akata i FERK-ovih pravila i propisa.
- (2) Pored uslova navedenih u članu 26. ovog Pravilnika kao i uslova iz tačaka a), b), c), d), g), i), j), k), l), m), n) i r) iz stava (1) ovog člana, u uslove dozvole za rad za

proizvodnju električne energije u mikro-postrojenju OIE uključuju se i uslovi koji se odnose na obavezu imaoca dozvole da obezbijedi posebno registrovanje proizvedene električne energije u mikro-postrojenju OIE.

Član 28.

(Dodatni uslovi dozvole za rad za distribuciju električne energije)

Pored uslova navedenih u članu 26. ovog Pravilnika u uslove dozvole za rad za distribuciju električne energije uključuju se i dodatni uslovi:

- a) kojima se propisuje obaveza ispunjavanja svih tehničkih, operativnih, bezbjednosnih i drugih uslova u radu distributivnih postrojenja, uređaja i opreme za nesmetano pružanje javne usluge;
- b) kojima se propisuje obaveza posjedovanja mjernih uređaja na mjestima preuzimanja i isporuke električne energije;
- c) kojima se propisuje obaveza u pogledu bezbjednosti, pouzdanosti, energetske efikasnosti i kvaliteta električne energije za kupce, u skladu sa važećim propisima i standardima;
- d) kojima se imaocu dozvole propisuje obaveza nezavisnosti u pogledu pravne forme, organizacije i donošenja odluka, od drugih djelatnosti koje se ne odnose na djelatnost distribucije električne energije;
- e) kojim se imalac dozvole obavezuje omogućiti pristup na distributivnu mrežu svih korisnika distributivne mreže na objektivan, transparentan i nediskriminirajući način ako za to postoje tehnički i energetski uslovi;
- f) kojima se propisuje obaveza davanja prednosti u rješavanju zahtjeva za priključenje na elektroenergetsku mrežu proizvođača električne energije koji koriste OIE u odnosu na proizvođače koji ne koriste OIE u svojim proizvodnim objektima u skladu sa važećim pravilima i propisima kojima se reguliše priključak na prenosnu i distributivnu mrežu;
- g) koji obavezuju imaoca dozvole da primjenjuje Regulatorni kontni plan, u cilju osiguranja djelotvorne regulacije tarifa;
- h) kojima se propisuje obaveza jasnog i transparentnog obavještanja korisnika distributivne mreže o procedurama, troškovima i drugim uslovima priključenja i provodi aktivnosti neophodne za priključenje budućih korisnika na distributivnu mrežu;
- i) u pogledu obaveze korištenja mjernih i registrirajućih uređaja koji omogućuju mjerenje električne energije i upravljanje elektroenergetskim sistemom i redovnog očitavanja, održavanja, kontrole, podešavanja i kontrolisanja mjernih uređaja na mjernim mjestima sa krajnjim kupcima, kao i omogućavanja korištenja mjernih veličina, odnosno redovnog dostavljanja obračunskih podataka nadležnim snabdjevačima i Operatoru za OIEiEK u skladu sa propisima;
- j) kojima se osigurava pristup treće strane distributivnoj mreži na objektivan i nediskriminirajući način sa odgovarajućim odredbama koje se tiču kvalifikacije zahtjeva za pristup, procedura za odbijanje pristupa i žalbe FERK-u koje upućuju strane kojima je odbijen pristup ili su nezadovoljne uslovima pristupa;

- k) kojima se osigurava da je njegov cjenovnik usluga dostupan korisnicima distributivnog sistema, kao i odgovarajućeg radnog vremena kancelarija za odnose sa korisnicima distributivnog sistema;
- l) kojima se propisuje obaveza da na odgovarajući i nediskriminirajući način vrši razmjenu informacija kojima raspolaže u svojoj bazi podataka (u vezi mjerenja utrošene električne energije) sa učesnicima na tržištu električne energije, uz osiguranje zaštite povjerljivih informacija, pri čemu je potrebno pribaviti i prethodnu saglasnost krajnjeg kupca radi razmjene podataka o njegovoj potrošnji električne energije, osim ako za takvu saglasnost ne postoji pravni osnov;
- m) kojima se utvrđuje obaveza obavljanja javne usluge u skladu sa propisima;
- n) kojima se propisuje obaveza regulisanja vlasništva ili pravnog osnova za korištenje objekata i postrojenja, odnosno pravnog osnova za korištenje uređaja i opreme u svrhu obavljanja elektroprivredne djelatnosti;
- o) kojima se propisuje obaveza da izvrši demontažu i uklanjanje svih objekata i opreme i zemljište i/ili objekte vratiti u prvobitno stanje, u skladu sa Zakonom o električnoj energiji u Federaciji Bosne i Hercegovine;
- p) u vezi sa izradom i pridržavanjem mrežnih pravila distribucije i drugih akata (obrazaca, uputstava, obrazaca ugovora i sl.), te ih učiniti dostupnima korisnicima distributivne mreže;
- q) koji nameću obavezu za pogon, upravljanje, održavanje, obavezu razvoja i izgradnje distributivne mreže;
- r) kojima se propisuje obaveza dostavljanja FERK-u kratkoročnih i dugoročnih planova razvoja i izgradnje distributivne mreže radi odobravanja;
- s) kojima se osigurava prednost u dispečiranju unutar prijavljenog dnevnog rasporeda rada (vozni red) za kvalifikovanog proizvođača;
- t) kojima se propisuje obaveza izdavanja prethodne elektroenergetske saglasnosti i elektroenergetske saglasnosti za priključenje na distributivnu mrežu, u skladu sa Opštim uslovima za isporuku električne energije;
- u) koji se odnose na obavezu imaoća dozvole da nabavlja električnu energiju za pokrivanje distributivnih gubitaka, te konstantno preduzima mjere za smanjenje istih;
- v) koji se odnose na obavezu zaštite okoline i osiguranje trajne kontrole uticaja na okolinu;
- w) u pogledu jednakog i nediskriminirajućeg tretmana snabdjevača prilikom zaključivanja ugovora o korištenju distributivne mreže sa snabdjevačima radi snabdijevanja njihovih kupaca;
- x) u pogledu efikasnog provođenja procedure prilikom promjene snabdjevača;
- y) u kojima se propisuje obaveza ugradnje intervalnih brojila za kupce kojima se snaga mjeri;
- z) da kontinuirano utvrđuje i pohranjuje dnevne dijagrame opterećenja za sve kupce kojima se mjeri snaga;
- aa) da utvrđuje, prati i ažurira zamjenske dijagrame opterećenja za sve kategorije i grupe potrošnje za koji se ne vrši mjerenje snage i
- bb) bilo koji drugi uslov koji postavi FERK da bi se ispunili ciljevi zakona, podzakonskih akata i FERK-ovih pravila i propisa.

Član 29.

(Dodatni uslovi dozvole za snabdijevanje električnom energijom - dozvole I reda)

Pored uslova navedenih u članu 26. ovog Pravilnika u uslove dozvole za snabdijevanje električnom energijom – dozvole I reda uključuju se i dodatni uslovi:

- a) kojima se propisuje obaveza imaoca dozvole da licenciranu djelatnost kontinuirano obavlja funkcionalno razdvojeno od elektroprivrednih i ostalih djelatnosti;
- b) u vezi urednog snabdijevanja električnom energijom krajnjih kupaca;
- c) kojima se propisuje obaveza vršenja javne usluge uključujući i univerzalnu uslugu, kao i usluge javnog/rezervnog snabdjevača, ukoliko su mu iste dodijeljene;
- d) koji se odnose na obavezu imaoca dozvole da ugovara isporuku električne energije standardnog kvaliteta;
- e) uslovi koji obezbjeđuju da se usluge obračuna i fakturisanja isporučene električne energije, te naplata obračunate električne energije vrše na siguran i ekonomičan način za svako obračunsko mjesto potrošnje električne energije;
- f) koji osiguravaju da prilikom fakturisanja isporučene električne energije krajnjim kupcima bude vidljiva struktura računa (obračun potrošnje električne energije, distributivna mrežarina, mrežarina prenosa, naknada za podsticanje proizvodnje električne energije iz OIE, eventualne ostale naknade, porezi i slično);
- g) kojima se propisuje obaveza imaoca dozvole da preuzima električnu energiju proizvedenu iz postrojenja OIEiEK u skladu sa važećim propisima;
- h) kojim se propisuje pridržavanje propisanih tarifa/cijena električne energije za krajnje kupce koji se snabdijevaju putem javnog snabdjevača;
- i) u vezi sa nabavkom električne energije na ekonomičan način, u skladu sa zakonom i aktima FERK-a;
- j) kojima se osigurava stalno poboljšanje funkcije maloprodaje električne energije;
- k) koji imaoca dozvole obavezuju zaključiti ugovor o snabdijevanju električnom energijom sa svakim krajnjim kupcem električne energije;
- l) koji imaoca dozvole obavezuju zaključiti ugovor sa imaocem dozvole za rad za distribuciju električne energije za svoje krajnje kupce električne energije u skladu sa Opštim uslovima za isporuku električne energije;
- m) kojima se osigurava dostupnost njegovog cjenovnika usluga i kataloga za krajnje kupce, kao i odgovarajuće radno vrijeme kancelarija za odnose sa krajnjim kupcima električne energije;
- n) kojima se propisuje obaveza da na odgovarajući i nediskriminirajući način vrši razmjenu informacija kojima raspolaže u svojoj bazi podataka sa ODS-om i snabdjevačima, uz osiguranje zaštite povjerljivih informacija, pri čemu je potrebno pribaviti i prethodnu saglasnost krajnjeg kupca, osim ako za takvu saglasnost ne postoji pravni osnov;
- o) koji se odnose na obavezu imaoca dozvole dostavljati vozne redove BOS-u ili NOSBiH-u;
- p) koji su u vezi sa obustavom isporuke električne energije u skladu sa Zakonom o električnoj energiji u Federaciji Bosne i Hercegovine i Opštim uslovima za isporuku električne energije;

- q) kojima se propisuje obaveza u pogledu kvaliteta komercijalne usluge;
- r) kojim se propisuje način obavještavanja kupaca o svim izmjenama tarifa/cijena, te načinu podnošenja prigovora kupaca na račun za utrošenu električnu energiju i
- s) bilo koji drugi uslov koji postavi FERK da bi se ispunili ciljevi zakona, podzakonskih akata i FERK-ovih pravila i propisa.

Član 30.

(Dodatni uslovi dozvole za snabdijevanje električnom energijom - dozvole II reda)

Pored uslova navedenih u članu 26. ovog Pravilnika u uslove dozvole za snabdijevanje električnom energijom - dozvole II reda uključuju se i dodatni uslovi :

- a) kojima se propisuje obaveza imaoca dozvole da licenciranu djelatnost kontinuirano obavlja funkcionalno razdvojeno od elektroprivrednih i ostalih djelatnosti;
- b) koji se odnose na obavezu imaoca dozvole da ugovara isporuku električne energije standardnog kvaliteta;
- c) koji osiguravaju da se usluge obračuna i fakturisanja potrošnje električne energije kupaca pružaju na siguran i ekonomičan način;
- d) kojima se propisuje obaveza imaoca dozvole da preuzima električnu energiju proizvedenu iz postrojenja OIEiEK u skladu sa važećim propisima;
- e) koji osiguravaju da se prilikom fakturisanja isporučene električne energije krajnjim kupcima dostavljaju računi sa jasnom strukturom troškova, uključujući kao posebnu stavku naknadu za podsticanje proizvodnje električne energije iz OIE, u skladu sa propisima koji regulišu tu oblast;
- f) koji imaoca dozvole obavezuju da zaključi ugovor sa imaoцем dozvole za rad za distribuciju električne energije za svoje kupce električne energije u skladu sa Opštim uslovima za isporuku električne energije;
- g) kojima se propisuje obaveza poštivanja zaključenih ugovora;
- h) koji su u vezi sa obustavom isporuke električne energije u skladu sa Zakonom o električnoj energiji u Federaciji Bosne i Hercegovine i Opštim uslovima za isporuku električne energije;
- i) kojima se osigurava dostupnost njegovog cjenovnika usluga i kataloga za krajnje kupce, kao i odgovarajuće radno vrijeme kancelarija za odnose sa krajnjim kupcima električne energije, ukoliko će obavljati djelatnost snabdijevanja krajnjih kupaca električnom energijom;
- j) kojima se propisuje obaveza da na odgovarajući i nediskriminirajući način vrši razmjenu informacija kojima raspolaže u svojoj bazi podataka sa ODS-om i snabdjevačima, uz osiguranje zaštite povjerljivih informacija, pri čemu je potrebno pribaviti i prethodnu saglasnost krajnjeg kupca, osim ako za takvu saglasnost ne postoji pravni osnov;
- k) kojima se propisuje obaveza u pogledu kvaliteta komercijalne usluge;
- l) koji se odnose na prirodu informacija koje je imalac dozvole obavezan pružiti ODS-u i NOSBiH-u u vezi sa kupovinom i prodajom električne energije, na njihov zahtjev;
- m) koji se odnose na dostavljanje informacija ODS-u, NOSBiH-u, DERK-u, FERK-u i RERS-u;

- n) koji se odnose na potrebu usaglašenosti izvještaja za FERK od imaoца dozvole u vezi sa isporukom električne energije preko prenosnog i distributivnog sistema sa izvještajima NOSBiH-u i ODS-u, i
- o) bilo koji drugi uslov koji postavi FERK da bi se ispunili ciljevi zakona, podzakonskih akata i FERK-ovih pravila i propisa.

POGLAVLJE II PRETHODNA SAGLASNOST ZA IZGRADNJU DIREKTOG VODA

Član 31.

(Potrebni dokumenti uz zahtjev za izdavanje prethodne saglasnosti za izgradnju direktnog voda)

Uz zahtjev za izdavanje prethodne saglasnosti obavezno se prilažu sljedeći dokumenti:

- a) dokaz da je podnosiocu zahtjeva odbijen pristup distributivnoj mreži zbog ograničenih tehničkih ili pogonskih mogućnosti mreže od nadležnog ODS-a;
- b) aktuelni izvod iz sudskog registra nadležnog suda;
- c) obavještenje o razvrstavanju pravnog lica prema djelatnosti nadležne službe za statistiku;
- d) uvjerenje nadležne poreske uprave, a ukoliko je podnosilac zahtjeva obaveznik, i uvjerenje o registraciji/upisu u Jedinствени регистар обавезника директних пореза;
- e) izjava o svim otvorenim transakcijskim računima podnosioca zahtjeva i potvrda poslovne banke kod koje se nalazi glavni račun o solventnosti tog računa;
- f) idejni projekat, na osnovu kojeg je nadležni organ izdao urbanističku saglasnost;
- g) urbanistička saglasnost izdata od nadležnog organa (sa klauzulom pravosnažnosti);
- h) okolinska dozvola pribavljena u skladu sa propisima (sa klauzulom pravosnažnosti);
- i) ugovori o koncesiji ako se direktni vod gradi na osnovu koncesije;
- j) kopija katastarskog plana sa jasno definisanim katastarskim česticama na kojima se gradi direktni vod;
- k) plan izgradnje direktnog voda za koji se podnosi zahtjev i
- l) dokaz o uplati jednokratne naknade za obradu zahtjeva.

Član 32.

(Kriteriji za donošenje odluke o izdavanju prethodne saglasnosti za izgradnju direktnog voda)

Prethodna saglasnost izdaje se podnosiocu zahtjeva koji dokaže sljedeće:

- a) da je podnosiocu zahtjeva odbijen pristup distributivnoj mreži, zbog ograničenih tehničkih ili pogonskih mogućnosti distributivne mreže;
- b) da podnosilac zahtjeva obavlja elektroprivredne djelatnosti proizvodnje električne energije i/ili snabdijevanja električnom energijom;
- c) da je podnosilac zahtjeva upisan u odgovarajući registar za obavljanje elektroprivredne djelatnosti;
- d) da direktni vod nije u koliziji sa postojećom distributivnom mrežom ODS-a;

- e) da planirani direktni vod ispunjava sve propisane tehničke, operativne, sigurnosne i ostale uslove;
- f) da ispunjava sve uspostavljene kriterije za zaštitu okoline i obezbjeđuje kontinuiranu kontrolu uticaja na okolinu i
- g) da ima finansijsku i tehničku sposobnost završiti izgradnju direktnog voda na osnovu plana izgradnje direktnog voda.

Član 33.

(Uslovi za prethodnu saglasnost za izgradnju direktnog voda)

U rješenje o izdavanju prethodne saglasnosti uključuju se sljedeći uslovi:

- a) kojima se propisuje obaveza podnosiocu zahtjeva da direktni vod gradi u skladu sa glavnim projektom i građevinskom dozvolom izdatom od nadležnog organa;
- b) kojima se propisuje obaveza podnosiocu zahtjeva da demontira i/ili ukloni direktni vod i sve prateće distributivne objekte i vodove u skladu sa tehničkim zahtjevima i zahtjevima okoline, ukoliko ne završi izgradnju direktnog voda;
- c) kojima se propisuje obaveza podnosiocu zahtjeva da se tokom izgradnje direktnog voda pridržava principa zaštite okoline definisanih u uslovima okolinske dozvole;
- d) kojima se onemogućava priključenje kupca koji ima pogonske ili tehničke mogućnosti priključenja na postojeću distributivnu mrežu nadležnog ODS-a;
- e) koji obavezuju izvještavanje FERK-a o svim činjenicama koje mogu uticati na kašnjenje u gradnji objekta u odnosu na rok naveden u odobrenju za građenje i
- f) bilo koji drugi uslov koji postavi FERK da bi se ispunili ciljevi zakona, podzakonskih akata i FERK-ovih pravila i propisa.

POGLAVLJE III DOZVOLA ZA RAD OPERATORU ZA OIEiEK

Član 34.

(Dokumenti uz zahtjev za izdavanje dozvole za rad Operatoru za OIEiEK)

Uz zahtjev za izdavanje dozvole za rad Operatoru za OIEiEK obavezno se prilažu sljedeći dokumenti:

- a) aktuelni izvod iz sudskog registra nadležnog suda;
- b) obavještenje o razvrstavanju pravnog lica prema djelatnosti nadležne službe za statistiku;
- c) uvjerenje nadležne poreske uprave, a ukoliko je podnosilac zahtjeva obaveznik i uvjerenje o registraciji/upisu u Jedinствени registar obaveznika direktnih poreza;
- d) organizaciona struktura podnosioca zahtjeva iz koje je vidljivo da zapošljava stručno osposobljeni kadar za obavljanje zakonom propisanih nadležnosti;
- e) dokaz da podnosilac zahtjeva ima pravni osnov za korištenje prostora, uređaja i opreme za obavljanje svojih zakonom propisanih nadležnosti;
- f) komplet finansijskih izvještaja za prethodnu godinu (bilans stanja, bilans uspjeha, izvještaj o gotovinskim tokovima, izvještaj o promjenama na kapitalu, bilješke uz finansijske izvještaje i izvještaj nezavisnog revizora u skladu sa važećim propisima);
- g) izjava o svim otvorenim transakcijskim računima i potvrda poslovne banke kod koje se nalazi glavni račun o solventnosti tog računa;

- h) godišnji plan rada podnosioca zahtjeva i
- i) dokaz o uplati jednokratne naknade za obradu zahtjeva.

Član 35.

(Kriteriji za donošenje odluke o izdavanju dozvole za rad Operatoru za OIEiEK)

Dozvola za rad Operatoru za OIEiEK izdaje se podnosiocu zahtjeva kada isti dokaže da:

- a) ispunjava tehničke, operativne, organizacione i druge uslove za rad, u skladu sa važećim propisima;
- b) zapošljava stručno osposobljen kadar za obavljanje zakonom propisanih nadležnosti;
- c) ima pravni osnov za korištenje prostora, uređaja i opreme potrebnih za obavljanje licencirane djelatnosti i
- d) posjeduje finansijsku stabilnost za poslovanje kojom se osigurava ispunjavanje uslova dozvole.

Član 36.

(Uslovi dozvole za rad Operatoru za OIEiEK)

U dozvolu za rad Operatoru za OIEiEK uključuju se sljedeći uslovi:

- a) koji osiguravaju ispunjavanje kriterija iz člana 35. ovog Pravilnika;
- b) koji obavezuju imaoца dozvole da reguliše odnose sa učesnicima na tržištu električne energije u skladu sa pravilima tržišta;
- c) poštuju pravila tržišta električne energije;
- d) određeni za obezbjeđenje finansijskog integriteta i stabilnosti imaoца dozvole za obavljanje zakonom propisanih nadležnosti;
- e) kojima se zahtjeva puno poštivanje svih važećih zakonskih i podzakonskih akata, te ostalih pravila i propisa;
- f) određeni za osiguranje transparentnih i ispravnih računovodstvenih metoda za osiguranje odgovarajućeg uvida u sredstva, koje naplaćuje i isplaćuje Operator za OIEiEK, prilikom obavljanja zakonom propisanih nadležnosti;
- g) kojima se propisuje obaveza zapošljavati stručno osposobljen kadar za obavljanje zakonom propisanih nadležnosti;
- h) kojima se osigurava zaštita povjerljivih informacija, a do kojih imalac dozvole dođe prilikom obavljanja svojih zakonom propisanih nadležnosti;
- i) kojima se imalac dozvole obavezuje dostavljati polugodišnje i godišnje izvještaje o poslovanju, te informacije i podatke u skladu sa FERK-ovim pravilima i propisima o izvještavanju, drugim aktima i uslovima definisanim u dozvoli;
- j) održavanje i razvijanje informaciono-komunikacionih tehnologija, koje koristi za obavljanje zakonom propisanih nadležnosti (softver, hardver i komunikacije);
- k) vodi baze podataka, u vezi sa obavljanjem zakonom propisanih nadležnosti;
- l) koji se odnose na obaveze u pogledu plaćanja regulatorne naknade za period važenja dozvole i
- m) bilo koji drugi uslov koji postavi FERK da bi se ispunili ciljevi zakona, podzakonskih akata i FERK-ovih pravila i propisa.

POGLAVLJE IV SADRŽAJ DOZVOLE

Član 37.

(Sadržaj dozvole)

- (1) Naslovna strana dozvole za rad za obavljanje elektroprivredne djelatnosti, uključujući dozvolu za rad za proizvodnju električne energije u mikro-postrojenju OIE, te dozvola za rad Operatoru za OIEiEK sadrži naziv i sjedište, odnosno ime i adresu imaoca dozvole, identifikacioni broj imaoca dozvole, registarski broj dozvole, propisani kod/šifru imaoca dozvole kao učesnika na tržištu električne energije, period važenja dozvole, datum izdavanja dozvole i potpise članova FERK-a.
- (2) Osim uslova dozvole propisanih ovim Pravilnikom uslove dozvole sačinjavaju i:
 - a) opšte odredbe;
 - b) definicije;
 - c) obavljanje licencirane djelatnosti;
 - d) obaveze imaoca dozvole,
 - e) razdvajanje djelatnosti,
 - f) finansijski integritet i stabilnost imaoca dozvole;
 - g) kvalifikaciona struktura zaposlenika imaoca dozvole;
 - h) napuštanje ili izmjena djelatnosti;
 - i) nadgledanje;
 - j) izmjena i dopuna, prenos, obnova i oduzimanje dozvole;
 - k) sankcije;
 - l) rješavanje sporova;
 - m) ugovori;
 - n) komunikacija;
 - o) tajnost podataka i
 - p) regulatorna naknada.

DIO ČETVRTI - POSEBNI POSTUPCI U VEZI SA DOZVOLOM ZA RAD

Član 38.

(Pokretanje posebnih postupaka)

Postupak obnove, izmjene i dopune, prenosa i oduzimanja dozvole za rad može se pokrenuti na zahtjev imaoca dozvole i na vlastitu inicijativu FERK-a.

Član 39.

(Obnova dozvole za rad)

- (1) Imalac dozvole ima pravo po isteku perioda važenja dozvole za rad obnoviti dozvolu za rad u postupku i pod uslovima koji su ovim Pravilnikom propisani za izdavanje dozvole za rad.
- (2) Ukoliko imalac dozvole namjerava u kontinuitetu obavljati djelatnost za koju posjeduje dozvolu za rad, dužan je podnijeti zahtjev za obnovu dozvole za rad korištenjem obrasca zahtjeva za izdavanje/obnovu dozvole za rad najkasnije 120 dana prije isteka perioda važenja dozvole za rad.

Član 40.

(Izmjene i dopune dozvole)

- (1) Izmjene i dopune dozvole, po zahtjevu imaoца dozvole, mogu se izvršiti u sljedećim slučajevima:
 - a) vezanim za zakonske okvire, sudske odluke, ugovore ili neke druge događaje koje suštinski utiču na obavljanje djelatnosti;
 - b) u uslovima u kojima imalac dozvole nema kontrolu i pod kojima je ispunjavanje uslova iz dozvole za rad nemoguće (npr. viša sila, havarija na postrojenjima);
 - c) u slučaju izgradnje novih proizvodnih objekata i/ili promjene tehničkih karakteristika postojećih proizvodnih objekata potrebnih za obavljanje licencirane djelatnosti za koju je postojeća dozvola za rad izdata i
 - d) u slučaju prodaje ili prestanka rada proizvodnog objekta za koji je izdata dozvola za rad.
- (2) FERK može na vlastitu inicijativu pokrenuti postupak izmjene i dopune dozvole za rad da bi odgovorio na promjene zakona, podzakonskih akata, FERK-ovih pravila i propisa, da bi zaštitio opšti javni interes.

Član 41.

(Prenos dozvole za rad)

- (1) Imalac dozvole prethodnim podnošenjem zahtjeva FERK-u može, u periodu važenja izdate dozvole za rad, prenijeti svoju dozvolu za rad:
 - a) na jedno ili više društava u njegovoj svojini, koja se bave istom djelatnošću i
 - b) na drugo pravno lice.
- (2) U slučaju iz stava (1) tačka a) ovog člana, FERK rješenjem izdaje dozvolu za rad pravnom licu na koje je aktom o osnivanju ili ugovorom dosadašnji imalac dozvole istu prenio, kada FERK postupak izdavanja dozvole za rad provodi na osnovu dokumentacije za koju FERK ocijeni da je potrebna zavisno od konkretnog slučaja i bez održavanja javnih rasprava, ukoliko FERK tako odluči.
- (3) U slučaju iz stava (1) tačka b) ovog člana, uz zahtjev za prenos dozvole za rad postojećeg imaoца dozvole, podnosi se, kao sastavni dio, i zahtjev za izdavanje dozvole za rad novog/budućeg imaoца dozvole sa pratećom dokumentacijom koja se odnosi na novog imaoца dozvole, kada FERK postupak prenosa dozvole za rad vodi na isti način kao i postupak izdavanja dozvole za rad.
- (4) Do okončanja postupka prenosa dozvole za rad, postojeći imalac dozvole je obavezan nastaviti sa ispunjavanjem obaveza propisanih dozvolom za rad koja se prenosi.
- (5) Prenosu dozvole prethodi prenos prava korištenja sredstava kojima se obavlja djelatnost po predmetnoj dozvoli na lice na koje se ista prenosi, odnosno prava vlasništva, o čemu se uz zahtjev za prenos prilaže odgovarajuća dokumentacija.
- (6) FERK odluku o prenosu dozvole za rad donosi u formi rješenja, čiji je sastavni dio prenesena dozvola za rad.
- (7) Period važenja i uslovi prenesene dozvole ostaju isti.
- (8) FERK na vlastitu inicijativu pokreće postupak prenosa dozvole za rad na treća lica u slučajevima finansijske nesposobnosti, stečaja ili likvidacije postojećeg imaoца dozvole ako postoji mogućnost neispunjavanja obaveza javne usluge određene izdatom dozvolom za rad.

Član 42.

(Oduzimanje dozvole za rad)

- (1) FERK može oduzeti dozvolu za rad ukoliko:
 - a) imalac dozvole podnese zahtjev za oduzimanje dozvole za rad;
 - b) imalac dozvole ne poštuje uslove i rokove utvrđene dozvolom za rad;
 - c) imalac dozvole ne pruža FERK-u zahtijevane informacije i podatke u periodu važenja dozvole za rad neophodne za obavljanje poslova iz nadležnosti FERK-a;
 - d) je imalac dozvole dao neistinite podatke, na osnovu kojih je FERK izdao, izmijenio, dopunio ili prenio na drugo lice izdatu dozvolu za rad;
 - e) imalac dozvole namjerno podnosi FERK-u netačne informacije i podatke tokom perioda važenja dozvole za rad;
 - f) imalac dozvole ne omogući ovlaštenim licima FERK-a direktan pristup opremi i dokumentaciji;
 - g) je pokrenut postupak stečaja ili likvidacije ili je imaocu dozvole oduzeta koncesija i
 - h) imalac dozvole ne plati regulatornu naknadu.
- (2) Postupku oduzimanja dozvole iz stava (1) ovog člana, osim tačke a) prethodi pisana opomena FERK-a, u kojoj će se imalac dozvole pozvati da u određenom roku otkloni utvrđene nedostatke.
- (3) Ukoliko imalac dozvole u ostavljenom roku iz stava (2) ovog člana ne otkloni nedostatke, FERK pokreće postupak oduzimanja dozvole za rad.
- (4) Ukoliko tokom postupka imalac dozvole povuče svoj zahtjev za oduzimanje dozvole ili ispuni propisane uslove za obavljanje djelatnosti, FERK obustavlja postupak oduzimanja dozvole.

Član 43.

(Primjena pravila u posebnim postupcima)

- (1) Postupak obnove, izmjene i dopune, oduzimanja i prenosa dozvole, osim prenosa dozvole za rad iz člana 41. stav (1) tačka a) ovog Pravilnika, vodi se na isti način kao i postupak izdavanja dozvole.
- (2) Ukoliko su u zahtjevu za pokretanje postupaka iz stava (1) ovoga člana navedene činjenice ili podneseni dokazi na osnovu kojih se može utvrditi stanje stvari ili ako se to stanje može utvrditi na osnovu opštepoznatih činjenica ili na osnovu službenih podataka kojima FERK raspolaže, ovi postupci se mogu provesti i donijeti odluka o podnesenom zahtjevu i bez održavanja javne rasprave.

DIO PETI - REGISTAR DOZVOLA ZA RAD I PRETHODNIH SAGLASNOSTI

Član 44.

(Registar dozvola za rad i prethodnih saglasnosti)

- (1) FERK vodi registar izdatih dozvola za rad i prethodnih saglasnosti.
- (2) Registar dozvola za rad i prethodnih saglasnosti se sastoji od svih spisa (predmeta) koji obuhvataju sva akta i priloge koji se odnose na isto pitanje te čine posebnu cjelinu.
- (3) Registarski spis po svakoj dozvoli za rad i prethodnoj saglasnosti sadrži:

- a) zahtjev za izdavanje dozvole za rad za obavljanje elektroprivredne djelatnosti (uključujući i zahtjev za izdavanje dozvole za rad za proizvodnju električne energije u mikro-postrojenju OIE), zahtjev za izdavanje dozvole za rad Operatoru za OIEiEK, odnosno zahtjev za izdavanje prethodne saglasnosti za izgradnju direktnog voda;
 - b) dokumente i priloge koji se podnose uz zahtjev za izdavanje dozvole za rad, odnosno uz zahtjev za izdavanje prethodne saglasnosti;
 - c) dokumente u vezi sa javnim raspravama;
 - d) rješenje FERK-a;
 - e) dozvolu za rad za obavljanje licencirane djelatnosti, odnosno prethodnu saglasnost za izgradnju direktnog voda,
 - f) rješenje o izmjenama i dopunama, obnovi, prenosu ili oduzimanju dozvole za rad i
 - g) uloženi pravni lijek nadležnim organima na odluke FERK-a.
- (4) FERK vodi zbirni registar u elektronskoj formi koji sadrži sljedeće podatke:
- a) vrstu dozvole za rad, odnosno prethodne saglasnosti;
 - b) registarski broj dozvole za rad, odnosno broj prethodne saglasnosti;
 - c) naziv i sjedište, odnosno ime i adresu imaoca dozvole;
 - d) datum upisa u registar dozvola za rad i prethodnih saglasnosti;
 - e) identifikacioni broj imaoca dozvole;
 - f) propisani kod/šifru imaoca dozvole kao tržišnog učesnika;
 - g) datum izdavanja dozvole za rad, odnosno prethodne saglasnosti;
 - h) period važenja dozvole za rad i
 - i) datum donošenja rješenja o izmjenama i dopunama, obnovi, prenosu ili oduzimanju dozvole za rad.
- (5) FERK vodi u elektronskoj formi i listu podnijetih zahtjeva čije rješavanje je u toku.
- (6) FERK stavlja na raspolaganje javnosti, radi davanja na uvid i kopiranja, sve dokumente koji se tiču njegove nadležnosti izdavanja dozvola za rad i prethodnih saglasnosti, osim povjerljivih informacija koje su kao takve određene u skladu sa pravilnikom, kojim FERK propisuje zaštitu povjerljivih informacija.

Član 45.

(Objavljivanje u „Službenim novinama Federacije BiH“)

FERK konačna rješenja kojima odlučuje o zahtjevima vezanim za dozvole za rad i prethodne saglasnosti dostavlja stranama u postupku i objavljuje na internet stranici i oglasnoj tabli FERK-a, a dispozitiv rješenja u „Službenim novinama Federacije BiH“.

DIO ŠESTI - NADGLEDANJE

Član 46.

(Nadgledanje uslova dozvola za rad)

- (1) FERK nadgleda obavljanje licencirane djelatnosti.
- (2) Imalac dozvole je obavezan redovno izvještavati FERK u skladu sa odredbama FERK-ovih pravila i propisa o izvještavanju, drugim pravilima i propisima i uslovima definisanim u dozvoli za rad.

- (3) Ovlašteni zaposlenici FERK-a imaju pravo obavljati redovno i vanredno nadgledanje u prostorijama imaoaca dozvole i imaju pravo pristupa objektima, postrojenjima, opremi i dokumentima, da bi izvršili uvid u obavljanje licencirane djelatnosti u skladu sa uslovima izdate dozvole za rad.
- (4) Imalac dozvole je obavezan saradivati sa FERK-om tokom pripreme i prilikom obavljanja nadgledanja.
- (5) U slučaju prigovora treće strane protiv imaoaca dozvole FERK ispituje opravdanost prigovora i provjerava da li je poslovna praksa imaoaca dozvole u skladu sa uslovima dozvole za rad.

Član 47.
(Sankcije)

Ukoliko FERK zaključi da imalac dozvole nije ispoštovao ili krši uslove dozvole za rad, može preduzeti sljedeće aktivnosti:

- a) opominje imaoaca dozvole o evidentiranim nepravilnostima i određuje rokove za otklanjanje nedostataka;
- b) pokreće postupak izdavanja prekršajnog naloga u skladu sa krivičnim odredbama Zakona o električnoj energiji u Federaciji Bosne i Hercegovine i
- c) pokreće postupak oduzimanja dozvole za rad.

Član 48.
(Komunikacija)

- (1) Službena komunikacija između imaoaca dozvole i FERK-a obavlja se u pisanoj ili elektronskoj formi, odnosno faksom uz odgovarajuću primjenu odredbi člana 9. stava (1) i stava (2) ovog Pravilnika.
- (2) Imalac dozvole je dužan dostavljati FERK-u dokumentaciju i informacije u originalu (ovjerene i potpisane od lica ovlaštenog za zastupanje) ili u ovjerenoj kopiji ne starijoj od 60 dana.
- (3) Dokumentacija i informacije koje su dostavljene telefaksom ili elektronski dostavljaju se i u originalu ili ovjerenoj kopiji lično ili poštom na adresu FERK-a najkasnije u roku od sedam dana od dana dostave faksom ili elektronski.
- (4) Izvještaje i podatke za koje je FERK propisao obrasce, dostavljaju se u formi i na način kako je propisano FERK-ovim pravilima o izvještavanju.

DIO SEDMI - PRELAZNE I ZAVRŠNE ODREDBE

Član 49.
(Neriješeni zahtjevi)

Neriješeni zahtjevi koji su primljeni do stupanja na snagu ovog Pravilnika rješavat će se po odredbama ovog Pravilnika.

Član 50.

(Prestanak primjene Pravilnika za izdavanje dozvola-licenci)

Stupanjem na snagu ovog Pravilnika prestaje važiti Pravilnik za izdavanje dozvola („Službene novine Federacije BiH“ broj 43/14).

Član 51.

(Prilozi uz Pravilnik)

Sastavni dio ovog Pravilnika su prilozi i to:

- a) Prilog 1, koji sadrži obrasce za podnošenje zahtjeva za dozvolu za rad i prethodnu saglasnost i
- b) Prilog 2, koji sadrži tehničko-energetske parametre elektroenergetskih postrojenja i objekata.

Član 52.

(Saradnja sa drugim regulatornim komisijama)

FERK saraduje sa drugim regulatornim komisijama iz oblasti energije u Bosni i Hercegovini omogućavajući nesmetanu razmjenu informacija u vezi razmjene podataka o podnesenim zahtjevima za dozvole za rad i prethodne saglasnosti, nadgledanju i pitanjima provođenja, te vezanim odlukama.

Član 53.

(Pravna zaštita)

- (1) Odluka FERK-a o izdavanju, obnovi, izmjenama i dopunama, prenosu ili oduzimanju dozvole za rad, kao i odluka o izdavanju prethodne saglasnosti za izgradnju direktnog voda, je konačna.
- (2) Strana nezadovoljna odlukom može pokrenuti upravni spor kod nadležnog suda.

Član 54.

(Tumačenje Pravilnika)

- (1) Tumačenje odredbi ovog Pravilnika daje FERK.
- (2) Izmjene i dopune ovog Pravilnika vrše se po istom postupku koji se primjenjuje za njegovo donošenje.

Član 55.

(Stupanje na snagu)

Ovaj Pravilnik stupa na snagu osmog dana od dana objavljivanja u „Službenim novinama Federacije BiH“.

v.d. PREDSJEDNICE FERK-a
Vladenka Milović

Broj: 01-07-1178-02/16
Mostar, 16.12.2016. godine